

von dannen in Franckreich gereiset/ Vnd als Sie sich anfänglich ein halb Jahr zu Genff/ nach-[Jij v]mahls aber wol vber ein Jahr zu Saumur auffgehalten/ vnd er seinen Printzen in der Frantzösischen Sprache/ Mathematicis vñ allen andern Fürstlichen Leibes Exercitien mit allem fleiß vnd trewe vnterwiesen/ vnd hierauff die meisten Provintzen in Franckreich perlustrirret vnd durchreiset/ seynd sie endlich in die Königliche Stadt Pariß kommen/ da sie Fürst Christian des Eltern F. Gn. zu Anhalt<sup>26</sup>/ Christmilden Andenckens/ angetroffen/ welche eben von Chur Brandenburg zu dem damahligen König in Franckreich Heinrichen des Namens dem IV. in den Gölischen Krieges Expeditionen verschicket gewesen<sup>27</sup>/ angetroffen [*sic*]/ Vnd weil jetzt erwehnte Fürst Christians S. F. G. die Generals bestellung von Chur Brandenburg vnd Pfaltz Newburg angenommen/ Als haben Jhr F. Gn. gut befunden/ daß Fürst Joachim Ernsts F. Gn. mit jhme als ein Aventurirer in diesen Krieges Zug sich begeben solten/ vnnd haben derowegen jhre Rückreise durch Niederland/ do sie dann dem vornehmen vnd berühmten Kriegeshelden Printz Moritzen von Vranien<sup>28</sup> beandt worden/ wider in Deutschland genommen/ Vnd als eben in diesem Jahre/ nemlich im Jahr Christi 1610. da sie wider in Deutschland kommen/ die Belägerung der Vestung Göllich vorgenommen/ vnd in wehrender Belägerung der Herr [Jij r] Hoffmeister/ so nicht eine wenigere Wissenschaftt der fortification gehabt/ als auch sonderbare beliebung darzu getragen/ vnd deswegen von hohen vnd erfahrenen KriegesOfficirern vnd Ingenieurum selbst hoch gehalten worden/ in einem Lauffgraben/ darin er zweiffels ohne der Vestung gelegenheit absehen wollen/ aus der Stadt mit einem Rohr durch die lincke Achsel geschossen/ auch dahero vnd daran grosse/ auch vnsägliche Schmertzen gantzer sechs Wochen gelidten/ Nach Eroberung der Stadt Göllich mit Fürst Christians vnd Fürst Joachim Ernsts F. Gn. in Engelland zu ziehen verhindert worden/ Dannenhero hat er/ damit er desto füglicher vnd besser curiret, auch gäntzlich widerumb restituiret würde/ sich nach Düsseldorff begeben/ da er dann so lang still gelegen/ biß jhre beyde Fürstl. Gn. wiederumb zu rück aus Engelland/ vnd also fort anhero nach Dessaw gekommen seyn. Weil aber Fürst Johann Georgen Fürstl. Gn. jhren Herrn Sohn Fürst Joachim Er[n]sten bey Fürst Christian des Eltern F. Gn. noch länger vnd lieber gesehen/ Als ist sambt seinen Herrn/ der Herr Hoffmeister Sel. wider Anno 1611. auff Amberg<sup>29</sup> gereiset. Als Sie nun daselbst glücklich angelangt/ vnd Fürst Christians F. G. gut befunden vnd trewlichen gerathen/ daß sie sich nacher Anspach/ als da Marggraff Joachim Ernsts [Jij v] von Brandenburg<sup>30</sup> residirete, vnd der Anspachische Hoff in grossem flore vnd ansehen war/ begeben solten/ sind Sie darauff hingezogen/ vnd haben sich daselbst biß in Anno 1613. auffgehalten/ da dann vnser Herr Hoffmeister Sel. wegen seiner geschicklichkeit/ erfahrung vnd sonderbaren beliebung zu den Ritterspielen/ nicht allein von Jhr F. Gn. dem Marggraffen/ sondern auch von Graff Wilhelm von Manßfeld<sup>31</sup>/ des Hofes Anspach dazumahl Großmarschall/ vnd Graff Heinrich Wilhelm von Solms<sup>32</sup>/ in grosser æstimation vnd Ehre gehalten worden. Die Zeit über/ so er zu Anspach gewesen/ hat er mit J. F. Gn. dem Marggraffen vnterschiedene vornehme Reisen gethan/ als nach Heydelberg/ auff die damahlige Königliche Churfürstl. Heimführung in Anno